

Z cyklu: Òdjimczy słowã - 141

Czejbë nie bòla mie szpéra,
A brzëch nie bët taczi grëbi,
Bëm sã rëszôł jak Szakira
A sã jakno mòdél przëdôł...
Wënagòlił bëm sã całi
Chwëcył jabkò abò krëszkã
I wtromòlił dze na kamién
Widzec jem? Wãdzëlczì wezta
A namalujta mie w akce
Jakno żëwã jesz nôtërà
Wiele nie mdze trzeba płacëc
Kò to wiele nie kòsztëje...
Tëli, cobë nagrôc bëne
W piéckù z rena pònapalëc,
Cobë krew miała krążenié
A na cele le zdrów farwë...
Mùskùle pònapnã chãtno
Przëzdrzã sã w nã dobrã stronã
Jaz sztudérczi kùńsztu jãknã
A chiżni mdã w papiór skrobac...
Tak pò gòdzënie, czej zmòłknã
Zlëzã do nich z piedestału
I òbôczã, co za czòrta
Òni nagrëzdóné mają...
Pò òbzórkach - gòrzcze żale,
Bò spòdzóny bët nié tegò...
Ni ma widzec Fópchi wcale
Za to jabkò? Krëszka? Cëdo!

Tómk Fópka, Gdinia-Kaczé Bùczy, 21 stëcznika 2025 rokù, gòdz. 6.104 d.p.